

## 2 TIMOTEO

### Kukue Nuəfə Ko Paulo Ləwəni Útə Timoteo

<sup>1</sup> Mə, Paulo, wə eyə lə Onanto eto lefonə əsuə mimfiani Yesu Kristo eto ətənkpe, wə nlə letsya bobə itsyi lə nkpə bo buunyə lə Bonamute Yesu Kristo əsuə lə bo ku wə eto ləniyifoyifo əsuə nlə kukue komfo bəwəni kətə fə.

<sup>2</sup> Mə ubi lala Timoteo, nlə Boanto Onanto ku Bonamute Kristo Yesu bətə miə mə lefonə lə disiəko fə lə bənyə fə kaminsə, lə bətə fə diyuəsə.

#### *Nyə Kekleke Lə Bofokanə Əsuə.*

<sup>3</sup> Maasə Onanto wə meesumu fe kase mə banamə dıyifo ani. Nyə meeyifo nko ku mə utu wə laanlo mə dikpi əsuə. Nyə, masə wə ani ketsye ku kakəmi kalə wə lekprakpa lə fə disi lə nlə ola boto. <sup>4</sup> Nyə lə nkloma binəntu bia féwii, mala tinti miə məənyə fə lə əsuə lə iyue mə. <sup>5</sup> Maakloma bofokanə kekleke bo nkpe fə. Bofokanə bo eto okle ləkə fə ewu Lois ku fambe Eunike mə. Mfo nno miə fintsya kpe mu okle. <sup>6</sup> Nsusu bomfo eso minlə fə kukue komfo bəwəni bə lə alə kekleke ətəsa nnya Onanto dıtə fə lə lefe nə mımfi ani mıntəkə fə lə əsuə mınto ola. <sup>7</sup> Itsyise ləwəno nə Onanto dıtə boo, əəntə boate sikpi. Bomuu, útə bo ləwəno nə ləətə boənyə əsuəale, ku lelabi, ku əsuə eto ləkəle kato butəkə tsya.

<sup>8</sup> Lə nyamfo esoo, məntə lə kofani lə kələ fə bə ənyə alə Bonamute eto Ditiki Səə nə mə

bɔtɛyi nye lə kɔfani lə kɔlɛ fə lə mɔ disi nwə bákpe le diyo lə Kristo eto disi. Bomuu, fintsya ńyə kekkeke lə ənyə kanyi lə wə disi lə ələkə Bonamute eto Ditiki Sɛɛ nəmə ate. Itsyise Onanto ətə fə əsuəale bə lə afo nyamfo buyifo. <sup>9</sup> Onanto ni nwə dítə bo nkpə nya ókpadi bo nkə bofiani wə betidi. Inni lə bo kasɛ ka búyifo eso. Bomuu, iyifo wə Onanto eto nsusu ku kafo ekpe ka úfi útə bo eso. Nya eyɛ lə bo lɔniyifoyifo ku Bonamute Yesu Kristo əsuə nya búnyə Onanto eto lefonə nəmfo fɛ úyifo kawunsia kulaa tsya. <sup>10</sup> Nya mómɔɔ, Onanto ébuləkə nyamfo óte bo ekpa wuə lə Ofomfokətə Kristo Yesu əmfo eto bubə əsuə. Wə ni futsyə léso ukpə ku eto əsuəale ani. Nya eyɛ lə wə Ditiki Sɛɛ əsuəə, óboko bo nkpə bo kalosəkɔ lənsiembəkɛ kulefe. <sup>11</sup> Onanto efi mɛ uyifo nwə loobe wə letsya ku ɔtɔnkpe ku wə Ditiki Sɛɛ nəmfo eto oteasa. <sup>12</sup> Nya lə nyamfo esoo, nya minlə kanyi bunyə nɛ. Fɛɛ kɔfani annlə mɛ. Itsyise mfo nnɔ sitinti, nya nyi utidi wə əsuə mɔ bofokanɔ nkpɛ. Nya nyi tsya miə woose mɛ ku nya kenke mimfi minlə bokpe lə wə ani isu ese lə Diyi nəmə.

<sup>13</sup> Lɛ etiki sɛɛ ku nnya kenke mínte fə kukɔnɔ kekkeke, nya lə ayɛ lə nnya əsuə. Fɔ nya anɔ kekkeke nya lə eyifo lɔni ku Kristo Yesu lə lelabi əsuə. <sup>14</sup> Nya eyɛ lə Lɛwɔnɔ Kenkɛ eto əsuəale nya nkpe lə bo əsuəə, lə alɛ asa sɛɛ nya kenke bɛfi bətə fə kukɔnɔ.

<sup>15</sup> Eyi fə Asiafɔ eto bafokanɔfɔ kenke édu mɛ lə oflɔ, nko ke ni Figelo ku Hermefene tsya lídu mɛ lə oflɔ nɛ.

<sup>16</sup> Nlɛ Bonamute lekpaƙpa miə unyə Onesiforo ku wə diyo eto betidi kaminsə itsyise yéanlɛ wə kofani bə bákpe mɛ lə diyo. Bomuu, únyə ko mɛ nnya ówunsə ko mɛ tinti. <sup>17</sup> Nya lefe nə úbə Romaa, ótsyilama kenke óbɛbɛ mɛ isu ese lefene eto lefe únyə mɛ. <sup>18</sup> Nlɛ bɔtɔ miə lə Onanto lə unyə wə kaminsə lə wə Lekpoyi əsuə. Fə kosate yi esu ƙpə nnya əsuə ówunsəko mɛ lə Efeso.

## 2

<sup>1</sup> Nya fə, mɔ ubi, ƙpe nkɛale ɛyɛ lə Onanto eto lefonə nə úfi útə bo bə bookpe lə lɔniyifoyifo ku Kristo Yesu əsuə. <sup>2</sup> Nya lə asa nnya fáno bə nte lə betidi ƙpə eto ənəmii, nko kə ele bə fintsyia fi akpe lə betidi ba léfobano eto ani bə lə befi besu bate betidi bamba tsya. <sup>3</sup> Nýə keklege lə kanyi əsuə fe kase omamanyə sɛɛ ləənyə, ətə Kristo Yesu. <sup>4</sup> Omamanyə wə nyə sitinti itə wə keyifoo, woala nkə wə eyifosa lə ekpe wə uninə disuəyua. Nyaso woənsiəmbufi ani okpe lə betidi ba lenni bamamanyə eto asa nnya beeyifo əsuə. <sup>5</sup> Nko ini nɛ bə fɛ nwə leetsyetsyi lə udi ututɛɛ, ele bə uyifo lə afi nnya baakpe əsuə kukɔnɔ. <sup>6</sup> Okuɛmfo wə leeyifo keyifo ku otsyekle lə wə okuɛɛ, wə ni futsyə laaka wə bidikə bia budi nɛ. <sup>7</sup> Bu disi lə etiki nnya minlɛ fə bɔtɛyi mfo kenke laabe, itsyise nyi minkə Bonamute ebutə anɔ nyamble kenke kasɔ.

<sup>8</sup> Kloma Yesu Kristo wə ni Oka David eto ufluflu wə Onanto létakasə únyənsə utsyi okomə úbə fe kase Ditiki Sɛɛ nə minlɛ bɔtɛyi mfo nlɛ bote. <sup>9</sup> Nnlɛ kanyi bunyə lə Ditiki Sɛɛ nə maatɛyi eso. Nya bakpe mɛ lə amana kulaa tsya fe utidi

wə leeyifo asa bua. Fεε Onanto eto etiki alee, bəmbofo ni kusu buti! <sup>10</sup> Lə nyamfo eso maafɔ lesa saa akamini itə Onanto eto betidi ba ukələkə utsyə esoo, bə lə mə tsya lə bənyə bofo bo eyə lə Kristo Yesu mate əsuə lə bəyε lə nnya əsuə bunyə nkpə manlo eto disuəyuə.

<sup>11</sup> ɔnukuale uni baateyi bənkə,  
 “Lə búkpe ku wə,  
 bo tsya ebusiə nkpə ku wə.

<sup>12</sup> Lə bofo buńyə kekleke lə kanyinyənyə saa əsuə,  
 buudi seka ku wə.  
 Lə bəni wə,  
 wuntsya ebəni bo.

<sup>13</sup> Lə ibə bə bəyε bɔfokanɔ lə wə kula tsyaa,  
 wə, əmbəyε buyifo lə kenye ka utsyə əsuə.  
 Itsyise wəmbəni wə əsuə kulefe.”

*Lε Fə Əsuə Kukɔnɔ Bə Lə Onanto Lə Ofo Fə Kayo Sε.*

<sup>14</sup> Kaklomasə mə asa nyamfo nya lə əkə mə ato kekleke lə Onanto eto ənəmi bə lə bayε etiki bunə. Itsyise kasεε saa aambɔ le nya əsuə. Bomu asa nyamfo ətə bə yaabiasə mba laanɔ nya. Mə bɔfokanɔ ebəyue. <sup>15</sup> Lε fə əsuə kukɔnɔ lə kusu saa əsuə bə lə Onanto utə fə kayɔfofo sεε. Yifo fə keyifo kukɔnɔ bə kofani lə kəyε fə bɔle. Bomu yifo utidi wə laate Onanto eto Ditiki Sεε nəmə lə ɔnukuale kosate əsuə.

<sup>16</sup> Ləkə fə əsuə etsyiko lə akuentiki ku asa bimba bəteyi əsuə. Itsyise betidi ba leeyifo asa nyamfo eto oklee, yələkə mə nsusu ketsyiko lə Onanto sikpibote əsuə famfamfa. <sup>17</sup> Asa nyamfo eto okle bote ale lefabe nə leenkpə nə

laanyi kpitikpitikpiti. Nya betidi inuə ba léte asa nyamfo eto kakle ni Himeneo ku Fileto. <sup>18</sup> Banyanya kusu itsyi læ Ditiki Sɛɛ nəmə eto ɔnukuale əsuə, nya banlɛ bafokanɔfɔ eto nsusu bobiasə katɛyi bənkə botaka ketsyi ɔkɔmə kəbə nkɔpə eto lefe ébubə éfe. <sup>19</sup> Fɛɛ Onanto eto diyo eto leba nə əsuə óse ofati únyənsəə, ni nsi ínyə. Nya leba nəmfo əsuəə, ówɔni etiki nya læəbə mfo nkə, “Bonamute yi betidi ba ni wə bale nya,” nya “Utidi wə laateyi nkə ɔlɛ Bonamute busumuu, ele bə usinkli læ asa bua buyifo kama.”

<sup>20</sup> Lə diyo kplɛ saa, kedikpɛ akpa akpa læətsyə mfo. Befi sika sia béyifo kətsyuə kətsyuə ku sika flubia. Nya kətsyuə tsya sitə beefi baato kə fɛ nka baawoe tsya nkpe. Beeyifo kakpɛ kamfo læ esu esu əsuə, kətsyuə itə eyi sɛɛ eto budi eto keyifo. Nya kətsyuə tsya itə diyi saa eto keyifo buyifo.

<sup>21</sup> Nyaso læ utidi utsyuə ələkə wə əsuə utsyiko læ asa bua əsuə nya uyifo wə əsuə kɛnkɛɛ, ofo koya utə Bonamute fɛnkə kakpɛ ka baalo bəətsyə itə eyisədidi. Itə bə boofɔ wə bufi itə keyifo sɛɛ saa buyifo.

<sup>22</sup> Ləkə fə əsuə etsyiko læ bakosobi eto alasa bimba butəkəko əsuə. Nya yifo lesa saa læ kusu sɛɛ əsuə, læ əsiə bɔfokanɔ eto nkɔpə sɛɛ, læ akala betidi, nya læ əsiə nkɔpə kɔpoo ku mə læ diyuə əsuə. Yifo asa nyamfo ku mba nsi nkɔə sɛɛ, laato ola ku ketu ka lekpa bə ɔwunsəko mi. <sup>23</sup> Ləkə fə əsuə etsyiko læ ebukitiki ku etiki bimba budi əsuə, itsyise kədiə ete asa nyamfo eto oklee, læənə kaboko. <sup>24</sup> Nya yanle bə Bonamute eto usumunyə, læ ukədiə kədiə. Bomu ele bə ukəyifo

kafoeƙpe kətə utsyuə saa, udi oteasa sɛɛ, nya uyifo utidi wə diyuə. <sup>25</sup> Nya betidi ba laataka kənyə lə Ditiki Sɛɛ nəmfo əsuəə, ele bə ofo asa kasɔ buləkə kate mə ku utu buɛɛ. Nya ditsyuə Onanto ebutə nkə batsyi ləkɔəsi bawuninsə lə bafə Ditiki Sɛɛ nəmə. <sup>26</sup> Lə nyamfo əsuəə, mə nsusu ebɔsini bə lə bani Obonsam wə dɪfi mə úyifo mba leyifo wə lelabi əsuə.

### 3

#### *Betidi Ebɔni Onanto Lə Eyi Fɛfɛ ʒsuə.*

<sup>1</sup> Tsyə nyamfo lekpo fəə, lə eyi fɛfɛ əsuəə, lefe nə lɔkɛ ale ebubə. <sup>2</sup> Betidi ebola asa nnya luutə mə hā eto lələkəsə nya boola atabi. Boobesə əsuə kato nya bookənə əsuə. Booyifo betidi ba luukaka, betidi kedi etiki bua lə betidi əsuə nya booyifo mba lembubu mə antomə ku ambemə. Booyifo mba ləəntsyə kɔlɛ ku betidi ba ləmbofo Ditiki Sɛɛ nəmə banɔ tsya. <sup>3</sup> Booyifo betidi ba ləəmbɔkɛ lefonə itə betidi bamba ku mba ba ləənyə mə bətsyuə kaminsə. Booyifo betidi ba laateyi bidia kalɛ betidi lə kafo kabiasɛ mə aye ku betidi ba ləəmbə disuətsyə kabuasə asa. Nya mə ənəmi əmbunyə, bankpe disiale. Nya mə ni betidi ba laanla asa sɛɛ nɛ. <sup>4</sup> Mə ni betidi ba leedu mə bətsyuə. Nya mə ni betidi ba leebu bə mə ete ni babesibe ku betidi ba leebu bə mə hā ni bakplɛ banso ku betidi ba laala kawunsɪə kamfo eto kamini enso Onanto. <sup>5</sup> Betidi bamfo eto okle ákplatsya kate bə mə ni betidi sɛɛ, fɛɛ bámfo Onanto eto əsuəale bə bɔkɛ lə mə nkpe bə bensi əsuə. Nə fə əsuə ələkə lə betidi bamfi nti.

<sup>6</sup> Itsyise betidi bamfo eto okloee, beeyu kedufə læ betidi eto ayo kabiasə besio ba eto nsusu læmbə ale. Besio bamfó eto abua eyifo bitsyike itə mə itsyise beyifo abua akpa akpa nnya laakpa mə kakpe læ abua kpə əsuə. <sup>7</sup> Besio bamfo eto kakle aakase asa lefe saa, tsya bamfó etiki nyamə kaso bɔnɔ sitinti kulefe. <sup>8</sup> Kase eye fə Yane ku Yambre letaka bənyə læ Mose əsuə lefe nə léfe məə, kusu komfo əsuə ke bidia eto bateasa bamfo tsya ləye bátaka bənyə læ ɔnukualɛ eto Ditiki Sɛɛ nəmfo əsuə nɛ. Asa bua nya betidi bamfo nɛ buyifo afo mə nsusu kenke, itə bə bányansə mə bofo kanɔ eto ɔnukualesu. <sup>9</sup> Fɛɛ betidi bamfo eto okle əmbə sɛtɔ buusu, itsyise mə sɛmumu sia nkpe mə ebɔbɔ ete utidi saa nyə fe mba nɛ asa nyamfo eto okle buyifo nko, fe kase ibə læ Yane ku Yambre əsuə.

*Boanto Onanto Ebuləkə Fə Utsyiko Lə Bulə Saa Eto Okle Ɔsuə.*

<sup>10</sup> Fɛ fəə, ébunyə nya feenyi mə asatete, mə nkpe bo minsi, mə nsusu ku mə bofokanɔ, kase maakplatsya, kase maala betidi, ku kase məəmuə utu kalɛ læ kanyinyənyə əsuə. <sup>11</sup> Eyi kase bətənkɔ mə, bákpe mə bulə, mínyə kanyi lefe nə mímbə Antiokia ku Ikonion ku Listra. Kloma ohiá kplɛ wə bəte mə. Fɛ læ nnya amblɛ əsuəə, Bonamute ələkə mə utsyiko læ nnya kəmiə.

<sup>12</sup> ɔnukualɛ əmə ni bənkəə, betidi ba kenke læəsiə nkpe sɛɛ læ Kristo əsuəə, boonyə kanyi nya bookpe mə bulə bənyə mə læ əsuə. <sup>13</sup> Fɛɛ Betidi bua ku bidiabidia eto bateasa məə, kato ko mə asa bua buyifo loobe fe kase baanɛ betidi bɔwɛ kakpe ke. Nya mə kosate tsya betidi bamba

ebukawε mə kakpe. <sup>14</sup> Nya fəə, nla miə lə ənyə lə asa nnya fákase nya fáfo fánɔ tsa əsuə kekleke. Itsyise eyi betidi ba ɔflo fákase nya. <sup>15</sup> Idu lə fə sikpefi lefe kee, áte Kukue Kenke eto Awɔnisa eto etiki nya díbə yewunsəko fə fafiani obesibe, lə nyaso bofokətə eyε lə Kristo əsuə fánɔ.

<sup>16</sup> Eyε lə Onanto eto əsuəale əsuə nya bɔyεε buunyə asa nnya kenke baawɔni baakpe lə Kukue Kenke eto Asawɔniwɔni kəmiə. Nya elɛke itə asatete ku bunyenki kakpe utidi ku kɔlɛɛ ku bunəfofo itə nkpə sɛɛ siəsiə. <sup>17</sup> Bawɔni nya nko bə lə utidi saa wə difi wə əsuə utə Onanto ebɔflo nya yɔɔlɔ wə itsyə itə keyifo sɛɛ saa buyifo.

## 4

### *Fi Fə Kenye Edi Ditiki Sɛɛ Nə Mə Ate.*

<sup>1</sup> Nnyə lə Onanto ku Kristo Yesu wə luusinkli ubə okponko kawunsia eto betidi ku bəkpənkpə akpo eto kentye. Nya se wuusinkli ubə bio lə wə Sekadidi əsuə esoo, nle fə kɔle bɔle kekleke minkə, <sup>2</sup> bekpe kɔni o-o, bimbə kɔni o-o tsyaa, biləkə Ditiki Sɛɛ nəmə kentye bete. Bele mə kɔle, nya binyenki bekpe mə, lə bekpe mə nkεale. Nya lə ale asakasɔ buləkə kate məə, tsyə əsuə lə efi utu buε ku disuətsyə até mə. <sup>3</sup> Itsyise lefe ditsyue ebubə lefe nə betidi lensiəmbɔtɔnə bə bəətsyue ato banɔ Ditiki Sɛɛ nəmfo. Bomu boola bə baanɔ bateasa bamba ba lɔɔtɔyi mə etiki nya eto okle boola bə baakanɔ. <sup>4</sup> Bootsyoiko kama butsyi kakpe Ditiki Sɛɛ nəmfo kətəko etiki tsyuentisyue eto kama. <sup>5</sup> Nya fəə, le fə əsuə kukɔnɔ lə aye lə kusu ko leleke əsuə lə ekakpe ale lə kanyi saa əsuə. Nya lə eyifo keyifo kamə fe Ditiki Sɛɛ nəmə



eto nwə laabe ni letsya. Nya læ eyifo fə keyifo kukɔnɔ fe bafokanɔfɔ eto ɔtɔnkɔtɔnko.

<sup>6</sup> Itsyise mɔɔ, mɔ nkpə fe bɔlɛ kalosəko bubə nya boofi mɛ fe keditətə. Nya lefe tsya boyo bə mfe ndu læ kawunsiə kamfo. <sup>7</sup> Nkpɔ bɔkpɔ sɛɛ nya mínlosə mɔ keyifo fe nwə leetsyetsyi etsyi sɛɛ. Nya minlɛ mɔ bofokanɔ læ Kristo əsuə isu ese læ kalosəko. <sup>8</sup> Nya idu mɔmɔɔ, Onanto ebutə mɛ kayofofɔ sɛɛ ka nlɛ bote nkə nsi nkpə læ kusu əsuə fe nwə lefo ɔnɔ eto kayofofɔ ka bálɔ bətsyə itə mɛ. Iyifo kayofofɔ sɛɛ ka Bonamute wə laakpo lekpo læ kusu sɛɛ əsuə luutə mɛ læ duyɪ fɛfɛ əsuə. Nya inni mɔ mate ete loofɔ ni, bomu bonko betidi bamba ba kenke tsya díkəfi mə kusubebe bətəkə læ Bonamute eto bubə bio əsuə.

*Bə Mlə, Lə Ɛbə Ɔnyə Mɛ.*

<sup>9</sup> Yɛ kusu saa fofo læ əbə ənyə mɛ. <sup>10</sup> Itsyise Dema edu mɛ læ ɔflɔ læ usu utəkəko kawunsiə kamfo eto bikə læ Tesalonika. Nya Kreskee, usu Galatia nya Tito dísu Dalmatia. <sup>11</sup> Luka hā dibu onkpe mɛ læ ɔflɔ mfo. Nyaso kpa Marko læ bibə, itsyise uuyifo ɔwunsəkotsyuə tinti utə mɛ. <sup>12</sup> Ntsyese Tihiko Efeso. <sup>13</sup> Nya læ alɛ bubə, fo mɔ lɛyɔlefe eto awu nya míyani mintsyə læ Karpɔ ɔflɔ læ Troia aboko mɛ. Nya læ efi mɔ ekue titlu nya bɛfi kubukikue bɛyifo tsya aboko.

<sup>14</sup> Aleksandro wə ni ɔtsyuentsyuɛ eyifo mɛ kabua tinti. Nya Bonamute ebofo wə kayo læ nnya kɛnyɛ. <sup>15</sup> Nyaso fintsyə nɣə kekkeke læ abe kukɔnɔ læ wə əsuə, itsyise ɔtaka uɣyə læ bo asa nnya bɔnlɛ bote əsuə kekkeke.

<sup>16</sup> Lefe nə bákpadí mɛ ditutɛ lə lekpo etii, kutsyuə sa mámfo bubə kənyə mɛ kama lə etiki nyamə eti, bomu báyani mɛ bətsyə bédu. Fɛɛ nɛ Onanto lekprakpa minkə wəənnə mə koto lə nyamfo əsuə. <sup>17</sup> Fɛɛ Bonamute ənyə mɛ kama nya ókpe mɛ nkɛale nya díta mimfo Bonamute eto Ditiki Sɛɛ nəmə letsya bobɛ kətə mba lenni Yudafɔ mfo. Nya Bonamute díləkə mɛ utsyiko lə ukpə əsuə. <sup>18</sup> Bonamute ebuləkə mɛ utsyiko lə kabua saa əsuə, nya wookpa mɛ ɔyenko buɛ buɛ isu esɛ lefe nə mindufə wə sekakedikɔ kato. Diyənde eto atesə bufi bɔnlɛ Wə butə idu mɔmɔ isu manlo manlo. Ibə itə.

*Nnɛ Mi Bokla.*

<sup>19</sup> Məəsiəşə Priska ku Akwila ku Onesiforo eto diyo eto betidi kenke. <sup>20</sup> Erasto si okpe lə Korinto. Trofimo tsya lɛ bufi, nyaso nyani wə ntsyə lə Mileto. <sup>21</sup> Kpe əsuə ku nkɛale lə əbə etu mɛ mfo fɛ lɛyɔlefe lə eyo. Eubulo ku Pude ku Lino ku Klaudia ku bayimi fɛfɛ kenke bafokanɔfɔ kenke bə bəəsiəşə kukɔnɔ!

<sup>22</sup> Bonamute lə usiəko fə, nya nɛ wə lekprakpa bə lə ɔlɛ mi ola lə wə lefonə əsuə.

**Onanto eto kakle fɔfɔ; Sɛkpɛle  
Sekpele: Onanto eto kakle fɔfɔ; Sɛkpɛle New  
Testament**

copyright © 2008 Wycliffe Bible Translators, Inc.

Language: (Sekpele)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 28 Sep 2022 from source  
files dated 13 Jul 2022  
5fc03d2a-3cf8-5607-a6e0-9e1e197140bd